

Proyecto Hardrock Hotel a haya extension atrobe

ORANJESTAD — Southwest Horeca Development, desaroyador di e proyecto di Hardrock Hotel riba sitio unda te ainda e ruina di Bushiri Hotel ta para, a haya un extension atrobe pa yega na financiamiento. Minister di Turismo Otnar Oduber a notifica Bon Dia Aruba di esaki diasabra merdia.

“A extende e opcion pa Southwest. Banco tin confianza cu lo por keda cla dentro di poco”, asina Bon Dia Aruba a haya di conoce. Riba pregunta con largo extension lo bay ta e biaha aki no a haya contesta. Otro medionan di comunicacion a raporta cu lo trata di un periodo di tres luna, pero Bon Dia Aruba no por a confirma esaki independientemente. Tampoco ta conoci cu kico a convence Aruba Investment Bank (AIB) pa extende nan garantia di dos milyon dollar y si esaki definitivamente ta e extension final.

Pasenshi lo a muestra di a caba

Hecho ta cu te awo Southwest Horeca Development no por a logra pa keda cla pesar di varios extension.

Tur cos tabata muestra tambe cu pasenshi di banda di AIB y gobierno tabata cabando. Siman pasa ainda minister Oduber a duna di conoce cu Southwest Horeca Development lo mester bin cu cartanan hopi solido pa convence AIB y gobierno pa keda den e proyecto. E mandatario tabata categorisa e chens pa extende como ‘hopi limita’. Anteriormente minister Oduber ta mira e chens cu lo keda cla na ‘fifty-fifty’. E propio abogado di Southwest Horeca Development, Milko Baiz, a conta Bon Dia Aruba cu ta ‘depende’ con largo lo dura pa yega na financiamiento pa e proyecto miyonario aki y cu e proceso lo por dura un, of tres of cinco luna. Baiz no kier a duna niun declaracion oficial, pero den mesun rosea no a descarta cu su cliente lo por lanta un caso contra gobierno si acaso nan dicidi di revoca e opcion. Motibo lo ta pasobra entre otro e ultimo extension lo tabata mucho cortico.

‘14 extension’

Mientras tanto segun conteo di parlamentario Dangui Oduber, esaki ya ta di 14 extension cu Southwest Horeca Development a haya. “Ora



un ciudadano haya un tereno erfpacht di gobierno e ta haya 6 luna pa presenta un carta di banco cu e ta haya financiamiento pa cu su tereno.

Si e ciudadano no presenta cu financiamiento gobierno ta kita tereno di e ciudadano. Den e caso di e proyecto di Hard Rock e grupo a bolbe haya un extension pa no di prome ni di dos biaha sino pa di 14 biaha. A pesar cu Otnar Oduber a priminti pueblo cu

esaki lo tawata e ultimo extension y si e desaroyadornan no cumpli cu e fecha final lo bay ehecuta un mocion di parlamento di haci e area aki un beach publico”, asina Oduber ta duna di conoce den un comunicado di prensa.

“E biaha aki no a haya 20 dia mas manera tawata e caso cu e ultimo extension sino a haya un extension di 90 dia mas pa por presenta financiamiento pa e proyecto. Pakico

nos ta cuestiona esaki ta pasobra segun nos a compronde for di declaracion di minister mes ta cu tin mas grupo interesa pa desaroya e area aki. E ora e pregunta ta surgi, dicon tin tanto insistencia pa cu e grupo di Hard Rock aki? E otro gruponan ta interesa ainda? Dicon ta keda insisti den duna e grupo di Hard Rock Hotel extension tras di extension si tin mas grupo cu a muestra interes?”, e parlamentario di MEP ta puntra. □